



n° 4106

Här Fernand Etgen  
President vun der Chamber

Lëtzebuerg, de 17. Abrëll 2021

REÇU  
Par AM Christian, 07.07.19042021

Här President,

Esou ewéi den Artikel 84 vum Chambersreglement et virgesäit, bieden ech Iech, dës drénglech parlamentaresch Fro un den Här Premierminister an un d'Madamm Gesondheitsminister weider ze leeden.


De Staatsminister huet gëschter Mëtteg am Briefing nom Regierungsrat ugekënnegt datt vun der nächster Woch un, Persounen tëscht 30 a 54 Joer sech kënnen mellen fir fräiwëlleg mam AstraZeneca-Vaccin geimpft ze ginn. D'Regierung hält sech domadder un d'Recommandatiounen vun der Europäescher Medikamentenagence (EMA).

De Lëtzebuerger Conseil supérieur des maladies infectieuses (CSMI) dogéint schwätzt sech an engem neien Avis e Freideg dogéint aus, fir AstraZeneca bei Persounen ouni Virerkrankungen ënner 54 Joer anzesetzen. D'Experten vum CSMI recommandéieren an hirem Avis AstraZeneca just bei Leit anzesetzen, déi méi al wéi 55 Joer sinn. Persounen ënner 30 sollten deen Impfstoff net méi kréien, grad wéi gesond Persounen ouni Vulnerabilitéit tëscht 30 a 54 Joer.

An dësem Kontext géif ech gäre folgend Froen un d'Gesondheitsministesch stellen:

- Ass de Premierminister der Meenung datt d'Regierung mat dëser Decisioun de Précautionsprinzip opgëtt ?
- Wat sinn déi konkret Recommendatiounen vun der Regierung wat d'Impfen mat AstraZeneca betrëfft ?
- Ass d'Regierung der Meenung datt esou ënnerschiddlech Messagen hëllefräich sinn, fir dem, fir eng erfollegräich Impfcampagne esou wichtege Vertrauensverloscht bei de Leit entgéint ze wierken ?
- De Fall gesat datt méi Leit sech wäerte mellen fir fräiwëlleg mam AstraZeneca-Vaccin geimpft ze ginn wéi Dosen disponibel sinn, un Hand vu wéi enge Critèren wäert d'Regierung d'Leit invitéieren sech impfen ze loossen ?
- Wéi vill Leit déi bis elo schonn invitéiert waren sech impfen ze loossen, hunn den AstraZeneca-Vaccin refuséiert ?
- Spillt fir Leit déi sech fräiwëlleg mam AstraZeneca Vaccin impfe loossen weiderhin d'Gesetz vum 4. Juli 2000 iwwer d'Responsabilitéit vum Staat am Beräich vun den Impfungen dat Folgendes festhält : « Lorsqu'une vaccination imposée par une disposition légale ou réglementaire ou recommandée par l'Etat cause la mort de la personne vaccinée ou entraîne dans son chef une incapacité physique permanente, l'Etat répond du dommage (...). » ?

Här President, ech bieden Iech mäin déifste Respekt unzehuelen.

A handwritten signature in black ink, appearing to read 'M. Spautz', written in a cursive style with a horizontal line underlining the text.

Marc Spautz  
Deputéierten



LE GOUVERNEMENT  
DU GRAND-DUCHÉ DE LUXEMBOURG  
Ministère d'État

Luxembourg, le 23 avril 2021

Monsieur  
Marc HANSEN  
Ministre aux Relations avec le Parlement  
LUXEMBOURG

**Objet:** Réponse commune de Monsieur le Premier Ministre, Ministre d'État, et de Madame la Ministre de la Santé à la question parlementaire urgente n°4106 posée le 17 avril 2021 par l'honorable Député Monsieur Marc SPAUTZ et concernant la vaccination des personnes de 30 à 54 ans avec le vaccin Vaxzevria (AstraZeneca).

Monsieur le Ministre,

J'ai l'honneur de vous faire parvenir en annexe la réponse commune à la question parlementaire sous rubrique.

Veillez agréer, Monsieur le Ministre, l'expression de ma haute considération.

Le Premier Ministre

A handwritten signature in blue ink, consisting of a vertical line followed by a series of loops and a final horizontal stroke.

Ministre d'État

**Äntwert vun dem Här Premierminister, Staatsminister, a vun der Madamm Gesondheetsministesch op déi dringend parlamentaresch Fro n°4106 vum 17. Abrëll 2021 vun dem honorabelen Här Deputéierten Marc SPAUTZ iwwert d'Impfen vun de Leit tëschend 30 a 54 Joer mam Impfstoff Vaxzevria (AstraZeneca).**

**Zur Fro 1:**

D'Decisioun vun der Regierung, de Leit tëschent 30 a 54 Joer d'Méiglechkeet ze ginn, sech fräiwëlleg ze mëlle fir mat dem Impfstoff Vaxzevria (AstraZeneca) geimpft ze ginn ass am Aklang mat de Recommandatioune vun der europäescher Agence fir Medikamenter (EMA).

De 7. Abrëll 2021 koum d'EMA zur Konklusioun, datt ee méiglechen Zesammenhang tëschent der Administratioun vum Impfstoff Vaxzevria an ongewéinlechen Thrombosen, a Verbindung mat enger Thrombozytopenie, bannent 2 Wochen nom Impfen, besteet. D'EMA huet awer och kloer ënnerstrach, dass et sech heibäi em aussergewéinlech Thrombosen handelt, déi seelen optriede kéinten. An hirer Stellungnahme vum 7. Abrëll 2021 huet d'EMA och nees ënnerstrach, dass d'Virdeeler vum Impfstoff méi grouss sinn ewéi d'Risiken an huet d'Notze vum Impfstoff zu deem Zäitpunkt net a Fro gestalt, an dëst fir all Alterskategorie.

Ee Risiko besteet wéi bei all Impfstoff. Wann een awer genee kuckt wéi vill Leit scho weltwäit mat Vaxzevria geimpft goufen a wéi vill Leit doduerch Niewewierkungen erlidden hunn bzw wéi vill Leit no enger Impfung gestuerwe sinn, dann ass dat en extrem klénge Risiko. Ob jidder Fall ass dee Risiko bäi wäitem méi kléng wéi de Risiko, dass duerch permanent Verzögerungen am Kader vum Impfen de Virus weider mutéiert an et ëmmer méi schwéier gëtt de Virus Meeschter ze ginn.

Au Vu vun den Erkenntnisser, déi zu deem Zäitpunkt virleien, an ob Basis vun de Recommandatioune vun der EMA, huet d'Regierung de Precautionsprinzip net opginn.

**Zur Fro 2:**

D'Regierung huet hir Recommandatiounen ob Basis vum Avis vun der EMA an dem Conseil Supérieur des maladies infectieuses (CSMI) fixéiert, dat op Grond vun der Analyse vun den Experten, datt de Vaccin ee grouse Notzen an der Bekämpfung vun der Pandemie huet. Konkret heescht dat, datt de Vaccin bei Leit iwwert 55 Joer a bei Leit tëschent 30 a 54 Joer déi eng Vulnerabilitéit hunn ouni Restrictiounen benotzt gëtt, wéll hei de Rapport « bénéfice/risque » extrem favorabel ass. All aner Leit tëschent 30 a 54 Joer kréien d'Méiglechkeet, sech ob eng Waardelëscht fir den Vaxzevria anzeschreiwen wéll et och hei nach ëmmer ee kloere Bénéfice gëtt wann een sech impfe léist. Dës Approche och vun aner Länner ( z.B. Däitschland, England) applizéiert. Bei Leit ënnert 30 Joer gëtt de Vaxzevria net benotzt. Datselwecht gëllt, entsprechend enger fréierer Recommandatioun, och bei schwangere Fraen.

### **Zur Fro 3:**

D'Regierung ass der Meenung, dass grad an esou engem sensibelen Dossier, wéi d'Impfen am Kader vun der Lutte géint Covid-19, an an esou engem kriteschen Moment vun der Kris, transparent kommunizéiert muss ginn fir eben grad d'Vertraue vun de Bierger a Biergerinnen net ze verléieren. D'Regierung ass sech bewosst, dass dat dozou féiere kann, dass verschidden Messagen heinsdo widdersprénglech opgeholl kënne ginn. Duerfir ass eng kloer Kommunikatioun ëmsou méi wichteg.

D'Recommandatioune vum CSMI si méi nuancéiert wéi déi vun der EMA. Si sinn awer net widdersprénglech. Den CSMI setzt net den Impfstoff en tant que tel a Fro, a recommandéiert d'ailleurs selwer, dass een ob Vaxzevria zrëckgräife soll, och bei Leit tëschent 30 a 54 Joer, wann déi vulnerabel sinn, an et ass keen aneren Impfstoff do, wéll et wichteg ass schnell méiglechst vill Leit ze impfen.

### **Zur Fro 4:**

D'Aschreiwungslëscht fir d'Impfung mam Vaxzevria-Impfstoff gëtt chronologesch nom Prinzip "first come, first served" opgeschafft.

### **Zur Fro 5:**

Vun 37.319 Leit, déi an engem Impfzenter den Vaxzevria-Vaccin proposéiert kruten, hunn der 668 dësen Vaccin refuséiert. Dat entsprécht engem Taux de Refus vun 1.78%.

### **Zur Fro 6:**

D'Gesetz vum 4. Juli 2000 iwwer d'Responsabilitéit vum Staat am Beräich vun den Impfungen spillt weiderhin, well d'Impfung géint de SARS-COV 2 gëtt iwwert den ofgeännert Règlement grand-ducal vum 18. Oktober 2020 recommandéiert. Am Moment gëtt d'Covid-19 Impfung mat véier verschiddenen Impfstoffer recommandéiert : BNT162 Pfizer – BioNTech, mRNA-1273 Moderna, ChAdOx1 Vaxzevria a Johnson & Johnson. Den Vaxzevria ass also weiderhin en Impfstoff deen de Stat recommandéiert. D'Tatsaach, dass een sech fräiwëlleg op eng Lëscht schreiwe léist ännert näischt dorun, a soumat spillt weiderhin d'Responsabilitéit vum Staat wei se am uewe genannte Gesetz vum 4. Juli 2000 beschriwwen ass.